



ІССАПАР

ЖҰМЫС – ЖҮЙЕЛІ, БАҒДАР – АЙҚЫН



Суреттерді түсірген – Асһап ҚАЖЕКЕ

Облыс әкімі Марат Сұлтанғазиев Балқаш ауданы тұрғындарымен кезекті кездесуін өткізді. Жиынға мәслихат депутаттары, қоғамдық ұйым өкілдері, құқық қорғау және жергілікті атқарушы орган басшылары, аудан тұрғындары қатысты. Онда халықты толғандырған әлеуметтік мәселелерге баса назар аударылып, шешу жолдары айқындалды.

● Гүлзат БАЙҚОНЫСОВА —

Алдымен Балқаш ауданының әкімі Азат Құтпанбетов өткен кезеңде атқарылған және алдағы уақытқа жоспарланған жұмыс туралы баяндады. Айтуынша, аудан бюджетіндегі жалпы кіріс осы жылдың қазан айына дейін 9 млрд 358,2 млн теңге болады деп болжанған, нақты түскені – 8 млрд 551,3 млн теңге. Яғни орындалу деңгейі – 91,4 пайыз. Оның ішінде республикалық бюджет бойынша болжам 7 млрд

652,0 млн теңге болса, нақты түсім 6 млрд 676,4 млн теңгеге жеткен. Ал жергілікті бюджет түсімдері 1 млрд 874,9 млн теңгені құрап, орындалу көрсеткіші 109,9 пайызды көрсеткен. Ауыл шаруашылығы саласы бойынша осы жылдың 9 айында ішкі жалпы өнім көлемі 21 млрд 771,8 млн теңгеге жеткен. Нақты көлем индексі – 99,5%. Егін шаруашылығы бойынша 27 163,4 га жерге дәнді-дақылдар, мал азығы мен бақша өнімдері егілген. Шөп оруды науқаны кезінде барлығы 169 мың тонна жоңышқа, арпа-бидай оруды науқанында 5318,0 га алқаптан 9572,4 тонна өнім жиналған. Орташа өнімділік – әр гектарына 18,0 центнер. Бүгінге 7 280,1 гектар күріш алқабы шабылып, 6 972,3 гектардан жиналған дән бастырылған. Барлығы 30 050,1 тонна өнім алынып, орташа өнімділік әр гектарға 43,1 центнерден айналған. Көктемгі және күзгі дала жұмыстарына 552 тонна арзандатылған дизель отыны бөлініп, шаруа қожалықтарына берілген.

– Биыл құрылыс жұмысына 9 айда 6 млрд 448,3 млн теңге жұмсалды. Тұрғын үйлердің жалпы аумағы – 5 225,0 шаршы метр. Аудан бойынша 20 елді мекенде орталықтандырылған

ауызсу құбыры тұрақты жұмыс істейді. Ауызсу жүйесін қайта жаңғырту және күрделі жөндеу жұмысы 4 ауылда жүргізілуде. Қараша айында аяқталып, пайдалануға беріледі. Қазіргі таңда Бақбақты, Бақанас, Ақдала, Ақжар, Қарой, Балатопар, Жиделі ауылдарының ауызсу жүйесін қайта жаңғырту және салу жұмысының жобалық-сметалық құжаттары дайындалуда. Ол үшін 52 млн теңге қаржы қарастырылған.

Ауданда газ желісіне 1 551 үй қосылған. Бүгінгі таңда Үшжарма ауылының жобасы сараптамадан өтті. Жоба құны – 689,6 млн теңге. Ал Ақкөл, Бура ауылдарына газ желісін тарту үшін жобалық-сметалық құжаттамалары дайындалып, сараптамадан өткізілуде.

Құқықбұзушылық бойынша өңірде соңғы 9 айда 95 қылмыс тіркелді. Төменгі Іле балық инспекциясы бөлімі қызметкерлерімен браконерлікпен күресу шаралары аясында 85 хаттама толтырылды. Оның ішінде 5 қылмыстық іс қозғалып, 8 хаттама сот органдарына жолданса, 72 хаттама бойынша әкімшілік іс қозғалды, – деді Азат Үктайұлы.

(Соңы 2-бетте) ➡

ӨЗЕКТІ МӘСЕЛЕ

КЕМШІЛІККЕ КЕҢШІЛІК ЖОҚ

Облыс әкімінің орынбасары Ғани Майлыбаев Іле және Талғар ауданындағы бірнеше мектепке атбасын бұрып, ондағы нақты жағдайды бағамдады. Сонымен қоса жауапты мердігерлерге мектептердің заман ағымына сай жабдықталуын талап етіп, сала мамандарына тиісті тапсырмалар берді. Қадағалау шарасында Іле және Талғар аудандарының әкімдері Қайыржан Жақсымбетов пен Таңат Айдарбеков, прокуратура мен қоғам белсенділері болды.



● Ерзат АСЫЛ —

Ең алдымен Ғани Айдарұлы Іле ауданының М.Түймебаев ауылындағы №20 орта мектебіне табан тіреді. Аталған мектеп өткен жылы ақпан айындағы жер сілкінісінен кейін жарамсыз болып қалған. Сол себепті мектеп ғимаратына төтенше жағдайдың салдарын жою және жөндеу-қалпына келтіру жұмыстары жүргізілген. Сараптама қорытындысына сәйкес, мектепті қайта қалпына келтіруге қомақты қаржы бөлінген. Жөндеу-қалпына келтіру жұмыстары «ARCH STROY INVEST» ЖШС-мен жасалған келісімшарт аясында «АРЛАН-проект құрылыс» ЖШС құрылыс жұмысын, ал «KA Lider LTD» ЖШС техникалық қадағалауды жүзеге асырған. Мердігер мекемелер мектептің барлық блогында ішкі инженерлік желілерді жаңартып, еден, қабырға, төбе және терезелерге толық әрлеу жұмыстарын жүргізген. Сонымен қатар, ғимараттың қасбеті толығымен алюминий панельдермен қапталды. Алайда мектептің жертелесінде су ағып, кәріз жүйесінен ақаулар табылған.

(Соңы 2-бетте) ➡



Нартай СӨРСЕНҒАЛИЕВ,
ҚР Парламенті Мәжілісінің депутаты:

ПРАНК – ПАРЫҚСЫЗ ӘРЕКЕТ

– Бүгінгі сөзім «Ойын түбі – от, тұман түбі – жұт» дегенді санасына сіңірмеген селтеңбайлар туралы болмақ. Қазір қоғамда пранкпен парақшасындағы лүпілдің санын арттырғанмен парасат биігінен омақаса құлағандар қаптап кетті. Адамды қорқытуды, қоғамдық орында ақымақтық жасауды қызық көріп, әзілдің шекарасынан шығып кеткен әркімдер әлеуметтік желіде әлек салуды доғармай тұр.

Нақты мысал айтайын. Астана қаласында блогер достарымен бірге жеделсаты ішіне жалған «мәйітті» кіргізіп, кейін жарықты өшіреді. Сол сәтте мәйіт кейпіндегі адам қозғала бастайды. Жеделсатының ішінде болғандардың жан дауысы шығады. Елорданың тағы бір тұрғыны жеделсатыға тапанишамен кіріп, оны адамдарға кезеп, зәре-құтын алады. Алматыда блогерлер аула сыпырушыларға қоқыс лақтырып, мазақ етіп, бейнежазба түсіріп таратады. Мұндай мысал мың! Желіге желімдей жабысқандар пранк деп атайтын бұл әрекеттердің ақылға томпақ екенін аңғару қиын емес.

Ол ол ма, біздің блогерсымақтар шетелге барып, абыройды айрандай төгіп жүр. Мәселен, қазақстандық блогер Аружан Айбекова Қытайда ұрлық жасап жатқандай бейнекөрініс түсірген. Арты үлкен шу болып, ақыры әлгі қыз жергілікті полицияға шақырылды. Түсініру жұмыстары жүргізілді. Бірақ ол түсінді ме? Өйткені дәл осы блогердің арада аз уақыт өткенде Ташкент метросында жәсіттердің қолынан ұстап, тиіскені туралы бейнежазба тағы тарады. «Ойыннан да омыртқа сынатынын» білмейтін мұндай блогерсымақтарды қатаң жауапқа тартатын кез келді. Себебі бұл адамның жеке өміріне қол сұғу, қоғамдық тәртіпті бұзу!


Қазір пранк деген парықсыз әрекеттің тағы бір түрі пайда болды. Ол жасанды интеллектімен жасалады. Бірінде Мемлекет басшыларының, лауазымды тұлғалардың қандай да бір дүкенге сауда жасауға келгені бейнеленген. Цифрлық технологияны білмейтін адамның санасы сан саққа жүгіреді, сеніп қалады. Маркетинг үшін деп жасанды интеллект арқылы жасандылыққа жүгіруді тоқтату керек. Тағы бір пранкте балалар ата-аналарына «Танымайтын адам үйге келіп тұр, не істейміз?» деп жасанды интеллект арқылы беймәлім адамның үйге кіріп кеткен, пәтерді аралып жүрген суреттерін жібереді. Зәресі ұшқан ата-ана полицияға телефон шалады, жұмысын тастап, үйіне барады. Ақырында бұл пранк деп балашаға бейқам отырады. Дәл сол уақытта полиция шын мұқтаж адамға көмекке баруға үлгермей қалуы мүмкін, оны интернетте отырғандар ұқпайды.

Ол ол ма, жуырда бір блогердің тірідей табытқа жатып, өзін көміп, «24 сағат табытта» атты челлендж бастағанын қоғам қатаң сынға алды. Хәкім Абай «Ішпек, жемек, кимек, күлмек, көңіл көтермек – бұл нәрселердің бәрінің де өлшеуі бар. Өлшеуінен асырса, зияны тимек» деген уағызды. Сондықтан өлшемге өресі жетпейтіндерді заңмен тұсайтын кез келді.

Осыған орай пранк барысында қоғамдық тәртіпті бұзған, жеке адамның өміріне қол сұққандардың анықтап, олардың бірыңғай тізімін жасап, жариялауды, қауіпті пранк арқылы адамның ар-намысы мен абыройына қол сұққандардың әлеуметтік желідегі парақшаларын дереу бұзатпай, әлеуметтік желі әкімшілерінен қауіпті пранктер мен бейнежазба жарияланған парақшаларды зерттеп, уәжілетті органға жедел хабарлауды, мұндай теріс құбылыстың алдын алу мақсатында ақпараттық-түсіндіру жұмыстарын жүйелі түрде, нәтиже беретін контент ретінде жүргізуді орынды ұсыныс деп санаймын.

— БҮГІНГІ НӨМІРДЕ:

Адалдықтан айнымаған



Ол шынайы еді. Жасандылықты жаратпайтын. Өмірі де солай өрледі. Мағыналы, мазмұнды ғұмыр сүрді. Арына қылау түсірмеуге тырысты. Тура айтты, тура жүрді.

4-бетті қараңыз

Антарктидаға қала атауын айшықтаған



Осындай бір кішкентай еңбегіммен еліме, жеріме деген құрметімді паш еткенім бар. Арнаулы тақтайшаға «Қапшағай» деп жазып, оны мұз үстіне бекіттім.

5-бетті қараңыз



БАЙҚАУ

ӘН ӘУЕЛЕП, КҮЙ ТӨГІЛДІ

«Мың бала» республикалық мәдени-ағартушылық жобасы Қазақстан халқы Ассамблеясы бастамасымен 2015 жылдан бері жүзеге асырылып келеді. Бұл байқау өскелең ұрпақты, атап айтқанда, еліміздегі түрлі этнос өкілдерін мемлекеттік тілді үйренуге ынталандыру арқылы қазақстандық бірегейлікті дамытуға бағытталған. Талғар қаласындағы Абай атындағы №3 орта мектепте аталған конкурстың өңірлік кезеңі өтті. Ол әйгілі композитор, дәулескер күйші, даңқты дирижер Нұрғиса Тілендиевтің 100 жылдығына арналды.



Құтмағамбет ҚОНЫСБАЙ —

Мектептің мәжіліс залында әр ауданнан келген жас өнерпаздар ұлттық аспаптарда Нұрғиса Тілендиевтің туындыларын орындады. Олардың өнерін облыстық ҚХА төрағасының орынбасары, «Ронай» күрд этномәдени орталығының төрағасы Гамзе Гейдаров, Талғар аудандық мәдениет бөлімінің өкілі Ділда Әбілқасымова, «Қоғамдық келісім және даму орталығы» мемлекеттік мекемесі этномәдени орталықтар жұмысын үйлестіру бөлімінің басшысы Жансұлу Бәшенова қатысқан қазылар алқасы бағалап отырды.

Өнер сайысын ашқан қазылар алқасының төрағасы Гамзе Гейдаров этностар арасында тіл мәдениетін дамытуға

елеулі үлес қосқан «Мың бала» байқауының маңыздылығын атап өтті. Ол:

— Жоба өскелең ұрпақты – мектеп жасына дейінгі балалар мен мектеп оқушыларын, сондай-ақ түрлі этнос жастарын Қазақстан халқының ұлттық және рухани құндылықтарына баулуға, мемлекеттік тілді насихаттауға бағытталған. Біз бүгін осындай игі шараға қатысып жатқан өнерлі де талапты балаларды көріп отырғанымызға қуаныштымыз және олардың шығармашылық бастамасына әрдайым қолдау көрсетуге дайынбыз, – деп қатысушыларға сәттілік тіледі.

Сахнаға бірінші болып Қонаев қаласынан келген Любовь Краснобаева «Елге сәлем» әнімен шықты. Іле ауданының намысын қорғаған Вадим

Травин Нұрғиса Тілендиевтің «Ата толғауы» күйін асқан шеберлікпен орындады. Ал ақындар мен батырлар елі саналатын Жамбыл ауданының өкілі Алексей Юрченко Капездің «Үш Меркі» әнін әуелетті. Дәулескер күйшінің «Әлкисасын» Карасай ауданының өкілі Валерия Ким, Жамбыл ауданынан Ағмат Ислам Әбдімомун Желдібаевтың «Ерке сылқым» күйін күмбірлетті. Іле ауданынан келген Виктория Коваленко «Балапан қаз» халық әнін шырқап, осы ауданның «Наворис» тобы «Кеңес» күйін тартып, шеберліктерін паш етті. Талғар ауданының намысын қорғаған Лейла Әлиева Абдулхамит Райымбергеновтің «Секіртпе» күйін орындаса, Іле ауданынан келген Арафат Розахунов Нұрғиса Тілендиевтің «Өз елім» әнін шырқады. Жас әртістердің өнері Іле ауданынан келген Анастасия Сундукованың орындауындағы Нұрғиса Тілендиевтің «Ата толғауы» әнімен аяқталды.

Қазылар алқасы байқау қорытындысын шығарды. «Мың бала» аталымында әлеуметтік желілерде Абай Құнанбаевтың өлеңін оқуға арналған үздік челлендж жариялаған Карасай ауданының 10-сынып оқушысы Туляй Татарова жеңімпаз атанды. «Өнерлі өрге жүзер» аталымында бірінші орынды Жамбыл ауданынан Алексей Юрченко, екінші орынды талғарлық Лейла Әлиева, үшінші орынды Іле ауданынан Виктория Коваленко иеленді. Жүлдегерлерге ақшалай сыйлықтар табысталды.

Байқау шарты бойынша облыстық кезеңнің жеңімпазы Астанада өтетін додаға қатысу құқығына ие болады. Бұл құрмет Алексей Юрченкоға бұйырды. Ол енді республикада облысымыздың намысын қорғайды

Талғар ауданы

САЙЫС

Жастардың жігерін жаныды

Қонаев қаласында Республика күніне орай «Бір ел – бір тағдыр» атты зияткерлік сайыс өтті. «АМАНАТ» партиясының облыстық филиалы жанындағы «Жастар рухы» жастар қанаты ұйымдастырған шараға қаладағы білім беру ұйымдарынан іріктелген 20-дан астам жас қатысты.

Аталған шараның мақсаты – жастардың ел тарихы мен тәуелсіздік құндылықтарына деген қызығушылығын арттыру, патриоттық рухты қушыейту және ұлттық сана мен жауапкершілікті қалыптастыру.

«Біз «Жастар рухының» белсенді мүшелерімен бірге отаншылдықты дәрiптeп, әр жас өз ойын ашық айтып, пікір білдіре алатын орта қалыптастыруды көздеді. Қазір жас ұрпақтың

білімге құштарлығы және ел дамуына үлес қосуға деген талпынысы қуантады. Осындай бастамалар олардың жігерін жанып, болашаққа деген сенімін нығайтады», – деді «Жастар рухы» жастар қанатының мүшесі Меруерт Тілек.

Зияткерлік сайысына қатысушылар бірнеше кезең бойынша сынға түсті. Қойылған сұрақтарға тұщымды жауап қайтарып, ой-өрісін, логикалық қабілетін және білім деңгейін жан-жақты көрсетуге тырысты. Ойын барысында жастар Қазақстанның тәуелсіздік тарихы, мемлекеттік рәміздер, ұлт бірлігі мен егемендіктің қалыптасу кезендері жөнінде білгенін ортаға салды.

Байқау қорытындысы бойынша бес оқушы үздік нәтиже көрсетті. Жеңімпаздарға Алғыс хат пен естелік сыйлықтар табысталды.

ӨЗ ТІЛШІМІЗ

Қонаев қаласы



Алматы облысы полиция департаменті «Құқық қорғау қызметі туралы» 2011 жылғы 6 қаңтардағы Қазақстан Республикасы Заңының 7-бабының 2-тармағына және «Ішкі істер органдарына түсетін үміткерлер үшін бастапқы кәсіптік даярлыққа іріктеу қағидаларын және оны өту шарттарын, сондай-ақ оларды бастапқы кәсіптік даярлықтан шығару негіздерін бекіту туралы» Қазақстан Республикасы ПМ-нің 2020 жылғы 13 наурыздағы № 211 бұйрығына сәйкес бастапқы кәсіптік даярлыққа іріктеу жүргізеді. Ішкі істер органының атауы: «Алматы облысы полиция департаменті» мемлекеттік мекемесі, орналасқан жерінің мекенжайы және конкурсқа қатысуға құқықтарды қабылдау үшін пошталық мекенжайы: 040000, Алматы облысы, Қонаев қаласы, Индустриальная көшесі, 1 үй, мекеменің электрондық мекенжайы: police_almbol@mail.ru. Мекеменің интернет сайты: http://mvd.gov.kz/portal/page/portal/almob/MAN , кадр қызметінің байланыс телефондары мен факс нөмірлері: 8(700) 163-78-16. Негізгі талаптар: Қазақстан Республикасы азаматтарының ішкі істер органдарына қызметке орналасуға құқығы бар, Заңда белгіленген талаптарға сәйкес келетін, жасы 18-ден кем емес, денсаулығы жақсы және дене дайындығы 170 см-ден төмен емес, тұрғылықты жері бойынша қорғаныс істері жөніндегі қалалық, аудандық бөлімдерде есепте тұрған және саптық қызметке жарамды деп танылған, қатардағы және кіші басыш құрам лауазымдарына 35 жасқа дейінгі, мерзімді әскери қызмет өткерген, орта білімнен төмен емес білімі бар адамдар қабылданады, орта басыш құрам лауазымдарына жасы 35-тен аспаған (шекті жасқа жеткен кезде ІІМ желісі бойынша оларда зейнетақы құқығы туындаған жағдайда) жоғары заң білімі бар адамдар қабылданады, сонымен қатар спорттық, жауынгерлік күрес түрлері және атыс бойынша біліктілік разрядтары бар адамдарға: спорт шеберіне, спорт шеберіне кандидаттарға ерекше көңіл бөлінеді. Құжаттарды қабылдау бос лауазымдар тізімдері жарияланған сәттен бастап он жұмыс күні ішінде жүзеге асырылады.				
2025 жылдың қазан айының 28 күніне Алматы облысы полиция департаментінің бос лауазымдар				
ТІЗІМІ				
Санаттар	Лауазымдардың атаулары	Біліміне қойылатын талаптар	Кәсіби міндеттемелеріне қойылатын талаптар (қызмет спецификасын көрсететін)	ПД бөліністерінің атаулары, бос лауазымдардың саны
C-SVO-7	Бас санитарлық дәрігер	Орта буын мамандарын даярлауды қамтамасыз ететін жоғары медициналық (әскери-медициналық) білім.	Осы санат бойынша лауазымдық міндеттерді орындау үшін қажетті білім. Осы санат бойынша арнайы сертификаттың болуы. Клиникалық, эксперимттік және медициналық (әскери-медициналық) желілері бойынша жұмыс өтілінің бар болуы.	Медициналық топ
C-SVO-7	Ішкі аудит тобының бас маманы	Нақты лауазымның функционалдық бағыттарына сәйкес келетін жоғары білім	Осы санаттағы лауазымдар бойынша функционалдық міндеттерін орындау үшін қажетті тиісті дағдылар және басқа да міндетті білімдер.	ПД ішкі аудит тобының бас маманы
C-SN-8***	Саптық бөлінісінің инспекторы	Орта буын мамандарын даярлауды қамтамасыз ететін жоғары білім немесе арнайы және кәсіптік, орта білімнен кейінгі білім.	Осы санат бойынша лауазымдық міндеттерді орындау үшін қажетті білім. Қарулы Күштер қатарында қызмет өткеру немесе Қазақстан Республикасының оқу орындары жанындағы әскери кафедра курстарын аяқтау. Күрес түрлері бойынша немесе ату бойынша спорттық, біліктілік разрядтарының болуы (қосалқы қызмет қызметкерлерін қоспағанда).	Жылдам қимылдайтын арнайы жасақ бөлінісі
C-SVR-8	Жедел уәкіл	Нақты лауазымның функционалдық бағыттарына сәйкес келетін жоғары білім	Осы санаттағы лауазымдар бойынша функционалдық міндеттерін орындау үшін қажетті тиісті дағдылар және басқа да міндетті білімдер.	Қалалық және аудандық баскарма, бөлімдерінің криминалдық полиция бөлімдері мен бөлімшелері
C-SVR-8	Тергеуші	Нақты лауазымның функционалдық бағыттарына сәйкес келетін жоғары заңгерлік білім	Осы санаттағы лауазымдар бойынша функционалдық міндеттерін орындау үшін қажетті тиісті дағдылар және басқа да міндетті білімдер. Тиісті ұйымдастырушылық және басқарушылық дағдыларының бар болуы.	Қалалық және аудандық баскарма, бөлімдерінің тергеу бөлімдері
C-SVR-8	Инспектор	Нақты лауазымның функционалдық бағыттарына сәйкес келетін жоғары білім	Осы санаттағы лауазымдар бойынша функционалдық міндеттерін орындау үшін қажетті тиісті дағдылар және басқа да міндетті білімдер.	Қалалық және аудандық баскарма, бөлімдерінің екінші арнайы топтары
C-SVR-4	Учаскелік полиция инспекторлары тобының учаскелік полиция инспекторы	Нақты лауазымның функционалдық бағыттарына сәйкес келетін жоғары заңгерлік білім	Осы санаттағы лауазымдар бойынша функционалдық міндеттерін орындау үшін қажетті тиісті дағдылар және басқа да міндетті білімдер. Қарулы Күштер қатарында қызмет еткен. Тиісті ұйымдастырушылық және басқарушылық дағдыларының бар болуы.	Қалалық және аудандық баскарма, бөлімдерінің қоғамдық қауіпсіздік бөлімдері, бөлімшелері
C-SVR-8	Инспектор	Нақты лауазымның функционалдық бағыттарына сәйкес келетін жоғары білім	Осы санаттағы лауазымдар бойынша функционалдық міндеттерін орындау үшін қажетті тиісті дағдылар және басқа да міндетті білімдер.	Алатау қаласы ПБ ақпараттандыру және байланыс тобы
C-SVR-8	Инспектор	Нақты лауазымның функционалдық бағыттарына сәйкес келетін жоғары білім	Осы санаттағы лауазымдар бойынша функционалдық міндеттерін орындау үшін қажетті тиісті дағдылар және басқа да міндетті білімдер.	Қалалық және аудандық баскарма, бөлімдерінің қоғамдық қауіпсіздік отбасылық-тұрмыстық зорлық-зомбылыққа қарсы күрес бөлімше топтары
C-SV-12	Полицейі	Орта білім	Осы санаттағы лауазымдар бойынша функционалдық міндеттерді орындау үшін қажетті тиісті дағдылар және басқа да міндетті білімдер. Қарулы Күштер қатарында қызмет ету.	Қалалық және аудандық баскарма, бөлімшелердің қылмыс жасағаны үшін күдіктілер мен айыпталушыларды уақытша ұстау изоляторлары
C-SV-12	Жүргізуші - полицейі	Орта білім	Осы санаттағы лауазымдар бойынша функционалдық міндеттерді орындау үшін қажетті тиісті дағдылар және басқа да міндетті білімдер. Қарулы Күштер қатарында қызмет ету.	Айдауыл қызметі взводы
C-SV-13	Техник	Орта білім	Осы санаттағы лауазымдар бойынша функционалдық міндеттерді орындау үшін қажетті тиісті дағдылар және басқа да міндетті білімдер. Қарулы Күштер қатарында қызмет ету.	Қалалық және аудандық баскарма, бөлімшелердің кенесесі
C-SV-13	Кіші инспектор-кинологы	Орта білім	Осы санаттағы лауазымдар бойынша функционалдық міндеттерді орындау үшін қажетті тиісті дағдылар және басқа да міндетті білімдер. Қарулы Күштер қатарында қызмет ету.	Қалалық және аудандық баскарма, бөлімдерінің кинологиялық қызметі тобы

ҚОҒАМДЫҚ КЕҢЕС

Қонаев қаласындағы Балаларды қолдау орталығына облыстық қоғамдық кеңес өкілдері үшінші мәрте кітап әкелді. Қоғамдық кеңес осыған дейін екі рет Балаларды қолдау орталығына барып, олардың әрқайсысының жас ерекшеліктеріне сай кітаптар сыйлаған еді. Айма кетейік, содан бері балалармен жүздесу тұрақты түрде дәстүрге айналып отыр. Бұл жолы да облыстық қоғамдық кеңес төрағасы Қазыбек Дәуіталиев пен оның мүшелері Зинаиш Күштекова, Риза Сауырбаева, Мәдіір Иманмәди арнайы барып, балалармен мәре-сәре болды.

Балаларды кітаппен тәрбиелейік



Осыған дейінгі кездесуде балалар оқығысы келетін кітаптардың тізімін берген еді. Сол тапсырыс өз денгейінде жүзеге асты. 11 жасар Денис ғажайыптарды жақсы көргендіктен, сол жанрдағы туындыны алса, Диар мен Сергей болашақта полиция болуды армандап, сақшылыққа баулитын кітаптарды иеленді. Ал Әліхан болса, өзінің есімін тектен-тек қойылмағанын біліп, Алаш зиялысы Әліхан Бөкейханов туралы көбірек білгісі келетінін жеткізген. Өзіне тарту етілген кітаптарды көрген балалар қуанғанын төбесі көкке бір елі жетпей қалды. Нұржанды өткен тарих қызықтырады екен, ол Міржақып Дулатовтың «Бақытсыз Жамалы» оқуды мақсат тұтыпты. Өңге жаны құмар Николай «Школьные песенки» кітабын, дәрігерлер туралы туындыны Нұржан еншіледі. Бес жасар Айсұлтан әдемі суреттермен көмкерілген құрастырғыш кітапшасы қолына тигеннен ары-бері құрастырып, әлек болып қалды. Зомбилер туралы қорқынышты әлемді ұнататын Қуаныш та, астрономия қызықтыратын Дамир де дегендерін қолына тигізді.

Үріп ауызға салардай, нәзіктік пен сұлулықтың символы болған қыздар жағы табиғат берген болмысынан алшақтамапты. Кір шалмаған аппақ көңілдері жанына жақын туындыларымен қауышты. Поэзияға біртабан жақын Раина Абай шығармаларын оқумен қатар, анаға қатысты кітапты оқуды мақсат тұтса, Інкәр «Өзінді бағала», Нұрай «Өмірдің аты М» деген туындылармен сусындамақ. Жалпы, балалар әлемдік бестселлер Гарри Поттерді жақсы білумен қатар, терең түсіну үшін оқығысы келетіндерін әр барған сайын айтады. Өткенде орысша 7 томдық Гарри Поттер кітапхана сөресіне түссе, осы жолы қазақшасымен толық жеткізілді. Осындайда оқимын деген ұрпақ болса, кітап беруге әзір алдығы толқынның бары жанға қуат береді.

«Қалауын тапса, қар жанар» демекші, расында кітап оқытудың түрлі тәсілі бар. Тек соның көзін таба білу керек. Кездесу барысында облыстық қоғамдық кеңес мүшелері балалармен емен-жарқын сөйлесті. Сұрақ-жауап бөлімін жасады. Жасөспірімдердің қалауын мұқият қадағалады. Оқыған туындыларының мазмұнын сұрады. Елшім де «Мен үлкенмін, шен-шекпенім бар» демеді. Барлық лауазым иелері мұнда тәтті балалық шаққа саяхат жасап, балаларды қуантты. Мұндағы ұтқан тұс – осы айрықша қарым-қатынастан балалардың қуанғанын көру, арманын білу, келешегіне жол ашу.

Президент Қ. Тоқаевтың Ұлттық Құрылтайдың IV отырысында берген тапсырмаларының бірі «Балалар кітапханасы» мен «Біртұтас тәрбие» бастамалары еді. Жаңа бастама аясындағы іс-шараның бірі осы десек, қателеспейміз. Президент тапсырмасын жүзеге асырып әрі балаларды рухани бақытты ете білу – үлкен еңбек!

Облыстық қоғамдық кеңестің миссиясы әлі де өз жағасын таппақ. Өйткені бұл жиын да балалардың басқа аманаттарын арқалатты. Оны уақытында тағы бөлісерміз, көзқаракты оқырман!

Арай ЖҰМАШҚЫЗЫ,

Алматы облыстық қоғамдық кеңесінің баспасөз хатшысы

ДЕНСАУЛЫҚ

Алдын алу маңызды

АИТВ – адамның иммундық жүйесін әлсіретін, түрлі ауруға қарсы тұру қабілетін төмендететін вирус. Дегенмен ауруды ерте анықтау және уақытылы ем қабылдау арқылы ұзақ өмір сүруге мүмкіндік бар.

Алайда ақпараттың тапшылығы мен жалған түсініктер салдарынан кейбір жастар АИТВ туралы нақты мәлімет ала алмайды. Әсіресе шалғай елдімекендерде бұл мәселе өзекті болып отыр. Мектептер мен колледждерде АИТВ тақырыбын қамтитын арнайы сабақтар сирек өткізіледі. Ұялу мен стигма бұл тақырыпты ата-анамен, ұстазбен немесе медицина қызметкерлерімен ашық талқылауда қиындық тудырады. Интернет пен медиаресурстардың шектеулігі сенімді дереккөзге қол жеткізуге мүмкіндік бермейді. Мобильді медицина мен сенім қызметтері туралы ақпарат аз таралған.

АИТВ-ның алдын алу және жастардың ақпараттық деңгейін арттыру мақсатында Алматы облысында осы жылдың 9 айында мектептер мен колледждерде бірқатар тренинг, семинар және акциялар өткізілді. Бұл шараларға 48 027 оқушы қатысты. Іс-шара барысында қатысушылар АИТВ жұқтыру қауіп жоғары жағдайды талдап, алдын алу жолдарын, желел тестілеу мүмкіндігін және басқа да маңызды аспектілерді қарастырды. Сонымен қатар мамандар жастардың сауалдарына жауап беріп, АИТВ туралы дұрыс түсінік қалыптастыруға ықпал етті.

Жастар – ел болашағы. Сондықтан олардың өз денсаулығына жауапкершілікпен қарауы және АИТВ туралы нақты ақпарат алуы аса маңызды.

Самал ҚОЖАЛНМОВА,

ШЖҚ «ЖИТС-тың алдын алу және оған қарсы күрес жөніндегі Алматы облыстық орталығы» КМК ұйымдастыру-әдістемелік бөлімінің меңгерушісі

ХАБАРЛАНДЫРУ

«DAUR CAPITAL» ЖШС ҚР Экологиялық коллексiнiң талаптарына сәйкес ашық жиналыс нысанында қоғамдық тыңдаулар өткізілетін туралы хабарлайды.

Жобаның атауы: «Алматы облысы, Қонаев қаласында кәріз тазарту құрылыстарын салу» жұмыс жобасына ықтимал әсерлер туралы есеп.

Әсер ету аумағы: ҚР Алматы облысы, Іле ауданы, Күрті ауылдық округі, Ақши ауылы, Күрті ауылдық округінің әкімшілік аумағының шекарасы, 3137 учаске және Қонаев қаласы.

Координаттары: 43°54'25.36"С, 76°56'57.26"Ш, 43°54'24.27"С, 76°56'58.46"Ш, 43°50'26.99"С, 77°01'24.26"В, 43°50'17.82"С, 77°01'45.58"Ш, 43°54'33.98"С, 76°56'56.68"Ш, 43°54'26.46"С, 76°57'02.80"Ш.

Қоғамдық тыңдаулар 2025 жылы 03 желтоқсан күні сағат 15:00-де ҚР Алматы облысы Қонаев қаласы, Жамбыл көшесі, 13, әкімдік ғимаратында өтеді.

Жоспарланған қызметтің бастамашысы: «DAUR CAPITAL» ЖШС, маман – Б.С.Танекенов, тел: +7 701 712 1883, Алматы қаласы, Алмалы ауданы, Гоголь көшесі, 86 үй, 706-кенес.

Әзірлеуші: «KZ Ecology» ЖҚ, Алматы облысы Қарасай ауданы Бекболат ауылы, Атамекен көшесі, 24 «А», тел: 8 (707) 3837818 e-mail: Jonist86@mail.ru.

Жобалық құжаттама пакетімен ақпараттың жүресінің <https://ndbecology.gov.kz/>, сондай-ақ «Алматы облысының табиғи ресурстар және табиғатты пайдалануды реттеу басқармасы» ММ сайтында «Қоғамдық тыңдаулар» бөлімінде таңысуға болады.

Ескертулер мен ұсыныстар қоғамдық тыңдаулар өткізілгенге дейін 3 жұмыс күнінен кешіктірілмей қабылданады. Электрондық мекенжайлар бойынша: <https://ndbecology.gov.kz/>; 329267eco@mail.ru қағаз нысанда: ҚР Алматы қаласы, Алмалы ауданы, Гоголь көшесі, 86 үй, 706-кенес.

Тыңдауларға қатысу үшін 2025 жылғы 03 қараша сағат 15:00-де сілтеме бойынша өту қажет: <https://us05web.zoom.us/j/86730226507?pwd=41BQR6bsb1Bb6bElhCO9lXabGMLk28.1> Конференция идентификаторы: 867 3022 6507; кіру коды: 7kW3Fb.

Тіркеу талқылау басталғанға дейін 30 минут бұрын басталады. Қосылу мәселелері бойынша көзделіп отырған қызмет бастамашысының телефондары бойынша хабарласуға болады. «Алматы облысының табиғи ресурстар және табиғатты пайдалануды реттеу басқармасы» ММ сілтемесі <https://www.gov.kz/memleket/entities/almobl-tabigat/about?lang=kk>

ОБЪЯВЛЕНИЕ

ТОО «DAUR CAPITAL», в соответствии с требованиями Экологического кодекса РК, уведомляет о проведении общественных слушаний в форме открытого собрания.

Наименование проекта: Отчет о возможных воздействиях к Рабочему проекту «Строительство канализационных очистных сооружений в г. Қонаев, Алматинский район».

Территория воздействия: РК, Алматинская обл., Илийский р-н, с.о. Куртинский, с. Ақши, Административная территориальная граница сельского округа Курты, уч.3137 и г. Қонаев.

Координаты: 43°54'25.36"С, 76°56'57.26"В, 43°54'24.27"С, 76°56'58.46"В, 43°50'26.99"С, 77°01'24.26"В, 43°50'17.82"С, 77°01'45.58"В, 43°54'33.98"С, 76°56'56.68"В, 43°54'26.46"С, 76°57'02.80"В.

Общественные слушания состоятся: 03 декабря 2025 года в 15:00 часов по адресу Алматинская обл. г.Қонаев, ул. Жамбыла, 13, в здании аппарата акима.

Инициатор намечаемой деятельности: ТОО «DAUR CAPITAL», специалист – Танекенов Б.С., тел: +7 701 712 1883, город Алматы, Алматинский район, улица Гоголя, дом 86, офис 706.

Разработчик: ИП «KZ Ecology», Алматинская область, Карасайский район, п.Бекболат, ул.Атамекен, 24 «А», тел: 8 (707)3837818 e-mail: Jonist86@mail.ru.

С пакетом проектной документации можно ознакомиться на информационной системе <https://ndbecology.gov.kz/>, а также сайте ГУ «Управление природных ресурсов и регулирования природопользования Алматинской области», в разделе «Общественные слушания».


Замечания и предложения принимаются не позднее 3-х рабочих дней до проведения общественных слушаний по электронному адресу: <https://ndbecology.gov.kz/>; 329267eco@mail.ru в бумажной форме по адресу: тел: +7 701 712 1883, город Алматы, Алматинский район, улица Гоголя, дом 86, офис 706.

Для участия в слушаниях 03 декабря 2025 года в 15:00 часов необходимо пройти по ссылке: <https://us05web.zoom.us/j/86730226507?pwd=41BQR6bsb1Bb6bElhCO9lXabGMLk28.1>

Идентификатор конференции: 86



ҚҰТТЫҚТАЙМЫЗ!



ПАРАСАТ БИІГІНДЕ

Ел руханиятына өлшеусіз еңбек сіңіріп жүрген белгілі жазушы-публицист Жақыпжан Нұрғожаевқа Қазақстан Республикасы Президентінің Жарлығымен «Парасат» ордені табысталды. Бұл – қаламгердің көп жылғы қажырлы еңбегіне, ұлттық әдебиет пен мәдениеттің өркендеуіне қосқан зор үлесіне берілген биік баға, ел мойындаған еңбектің айғағы.

Жақыпжан Нұрғожаев – қазақ әдебиетінде, сонымен қатар қазақ журналистикасында өзіндік қолтаңбасын қалдырған тұлға. Шығармаларына ар, намыс, адамдық пен адалдық сынды асыл қасиеттер арқау болып, оқырман жүрегінен жол тапқан. Оның әрбір туындысы – туған жерге, қазақ рухына, адамдық биікке деген шексіз сүйіспеншіліктің көрінісі.

Жазушының шығармашылық жолы – жас калам ұстаған ұрпаққа өнеге. Ол әдебиет айдынында адалдық пен азаматтықтың, ұлтқа қызмет етудің үлгісін көрсетті. Жақыпжан Нұрғожаевтың еңбегіне берілген осынау құрмет – қазақ қаламгерлерінің, соның ішінде Алматы облысының әдеби қауымының ортақ қуанышы.

Қаламыңыз ұштала берсін, өміріңіз өнегеге толы болсын, ардақты аға! Еңбегіңіз еленіп, абыройыңыз асқақтаған осы мәртебелі сәтпен кезінде өзіңіз ұзақ жыл бас редактор болған облыстық басылым атынан шын жүректен құттықтаймыз! Шығармашылық шабытыңыз саркылмай, парасат пен рух биігінде жарқырай беріңіз!

Алматы облыстық
«Алатау арайы» газетінің ұжымы

МЕРЕЙ



Композиторға құрмет


Жамбыл ауданының орталығы Ұзынағаштағы Мәдениет үйінде белгілі композитор, Мемлекеттік сыйлықтың лауреаты, Қазақстан Композиторлар одағы және Авторлар қоғамының құрметті төрағасы Балнұр Қыдырбектің 70 жасқа толуына арналған шығармашылық кеші өтті.

қазынасына айналды. Жазған күйлері мен симфониялық туындылары халқымыздың рухани болмысын аша түсіп, ананың мейірімін, даланың кеңдігін сезіндіреді. Мерейлі жасыңыз биік болсын! Шабытыңыз саркылмай, өнеріңіз өрлей берсін!» – деп сахна төрінде сый-құрмет көрсетті.

Шығармашылық кеш барысында театрландырылған көрініс қойылып, Балнұр Қыдырбектің өмірі мен еңбек жолының жарқын белестері сахналанды. Аудандық Мәдениет үйінің өнерпаздары мен жас музыканттар композитордың туындыларын орындады. Көпшілік алдында сөз алған кеш қонақтары мен аудан жұртшылығы мерейтой иесіне ұзақ ғұмыр, саркылмас шабыт, шығармашылық табыс тіледі. Балнұр Балғабекқызы жерлестеріне, әріптестеріне және шараны ұйымдастырушыларға жүрекжарды алғысын білдіріп, туған жердің жылы ықыласы мен құрметі шығармашылығына шабыт беретінін жеткізді.

Ұлт руханиятының іргесін бекемдеп, заманауи қазақ музыкасының биік белеске көтерілуіне сүбелі, ерен еңбек сіңірген композитор өзінің шығармашылық жолында ұлттық болмысты терең түйсініп, оны симфониялық, камералық, опералық жанрлармен сәтті үйлестіре білді. Ол 300-ден астам музыкалық шығарманың авторы. Өнер қайраткері биыл Президент Жарлығымен «Парасат» орденімен марапатталған.

Жамбыл ауданы



журналы әзірлеген «Қазақстан: Орталық Азияның ашылмаған қазыналары» атты нұсқаулықта еліміздің ең тартымды туристік бағыттары, мәдени нысандары және ұлттық тағамдары сипатталған. Елімізге саяхат жасауды жоспарлаған туристерге түрлі кеңестер, атап айтқанда, виза рәсімдеу жолдары, көлік қатынасы, қонақүй және жергілікті валюта туралы ақпараттар ұсынылған.

Шара барысында «Travel + Leisure Central Asia» журналының бас редакторы Барно Икрамова Орталық Азияның туристік әлеуетін жааңға танытатын журналдың өңірлік маңызына тоқталып өтті. Қазақстанның көрікті мекендері мен бай мәдениеті әлем оқырмандарын қызықтырғанын айтып, «Travel + Leisure Central Asia» бес елдің туристік әлеуетін біріктіретін платформа екенін жеткізді.

Журналдың бас кеңсесі Ташкент қаласында орналасқан. Редакция құрамында әлемнің әр түкпірінен келген авторлар мен фотографтар еңбек етеді. Қазірдің өзінде басылымның үш нөмірі жарық көріп, оқырмандар мен серіктестер тарапынан жоғары қызығушылық тудырған. Таныстырылым барысында қонақтар өңірлік туристік контентті дамыту бағытындағы идеяларымен бөлісті. Шара еркін форматта өтіп, алдағы бірлескен жобаларға жол ашты.

ӨНЕР ӨЛКЕСІНДЕ

Тыңдаған адамның санасын ұйытып, сезімтал жүректі шымырлатып, жансарайыңды ерекше күйге бөлейтін әсем әнді нақышына келтіре шырқап, халықтың ықыласына бөленіп жүрген өнерпаздардың бірі – Кеген халық театрының әртісі, «Ереуіл» халықтық-фольклорлық ансамблінің әншісі Сәмиға Әлдекенова. Ол 40 жыл мәдениет пен өнер саласында тынбай еңбек етіп, бүгінде мерейлі зейнет жасына жетіп отыр.



САНДУҒАШЫ



Суретте: Сәмиға Мұсағалиқызы, Мұқағалидың анасы Нағиманың ролінде

Дәурен ӘБУТӘЛІПОВ

Сәмиға Мұсағалиқызы қазақтың шежіресін тізбектеген Мұхамеджан Тынышбаев, әлем музыкасына үн қосқан Мұқан Төлебаев пен Еркеғали Рахмадиев, кино өнерінің майталманы Құман Тастанбеков, жауырыны жер иіскемеген Әбілсейіт Айханов пен Аманжол Бұғыбаевтардың кіндік қаны тамған киелі Сарқан өңірінде 1964 жылы дүниеге келген. Бакалы ауылындағы мектеп қабырғасынан түлеп ұшып, Жүсіпбек Елебеков атындағы Өнер студиясына оқуға түседі. Онда Зейнеп Қойшыбаеваның класында дәріс алады. Еңбек жолын 1985 жылы Кеген ауданы Тоғызбұлақ ұжымшарының халық театрында бастайды. Әр жылдарда Кеген аудандық мәдениет бөлімінде автоклуб меңгерушісі, әдіскер, көркемдік жетекші, Тасашы ауылдық Мәдениет үйінің директоры, аудандық Мәдениет үйінің дирижері болды. Қазіргі таңда Кеген халық театрының әртісі.

Әншінің өнер саласындағы жеке шығармашылығы театрмен байланысты. Бәкір Тәжібаевтың «Ана жүрегі» драмасында Алманың, Тәкен Әліпбаевтың «Даладағы дүбір» спектаклінде Зейнептің және Мұхтар Әуезовтің «Айман-Шолпан» пьесасында Айманның рөлдерін керемет сомдай білді. Кеген халық театры бүкілодақтық байқаудың бірнеше мәрте жеңімпазы атанды. Сәмиға Мұсағалиқызы 1998 жылы «Алматы – 98» атты республикалық ән конкурсында Бас жүлдені жеңіп алды.

Әншінің репертуары бай. «Бір бала», «Назқоңыр», «Гауһартас» секілді халық әндерін сүйіп орындайды. Латиф Хамидидің «Бұлбұлын» шырқаған кезде тындарман қауым бір серпіліп, өзгеше күйге бөленеді. Әйгілі Қапез Байғабыловтың «Үш Меркісін», жергілікті сазгер Жаксылық Әбдірамановтың, Бақытжан Құсайыновтың туған ел мен жер туралы әндерін де әуелете шырқайды. Оның әншілік дарыны Кеген мен Нарынқолға ғана емес, өзге де өңірлерге жақсы таныс. Өзі еңбек ететін халық театрының, «Ереуіл» халықтық-фольклорлық ансамблі құрамында облыстың бірқатар ауданында, Талдықорған, Алматы қалаларында гастрольдік сапармен барып, көрерменнің көзайымына айналған. Ауданның мәдениеті мен өнеріне сіңірген ерен еңбегі үшін облыс әкімінің және мәдениет басқармасының Құрмет грамотасын алды. «Мәдениет саласының үздігі» және «Еңбек ардагері» төсбелгілерімен марапатталды.

Сәмиға Мұсағалиқызы – үлгілі отбасының отанасы. Өмірлік серігі өмірден ерте озса да, тағдыр талқысына берілмей, балаларын тәрбиелеп өсірді. Дидар, Елдардай ұлдары мен Махаббат атты қызын қанаттандырды. Келін алып, қыз ұзатып, бес немере сүйіп отырған жайы бар.

Ол әрдайым аудандық Мәдениет үйінен табылады. Онда тілек-ниеті, мақсат-мүддесі бір әріптестері, өнер ордасы бар. Кезекті ән мен қойылымға әзірлік секілді жанына жақын іс жүрегін жайландырып, қиялына қанат бітіріп, көңілін жадырата түседі. Өнер иесі үшін одан асқан бақыт жоқ шығар?!

Туған елін әсем әнімен әлдилеген әншіге біз де жан жылуына толы мереке сәтінде мықты денсаулық пен зор шығармашылық табыс тілейміз.

Кеген ауданы



Бас редактордың бірінші орынбасары:

Алма ЕСЕНБАЙ

Бас редактордың орынбасары:

Болат МӘЖИТ

Жауапты хатшы:

Шолпан НҰРЖАУОВА

ҚҰРЫЛТАЙШЫ:
Алматы облысының әкімдігі
Меншік иесі: «Өлке тынысы» ЖШС

Директор:
Кәдірбек ҚҰНЫПИЯҰЛЫ

Бас редактор:
Қуаныш ТҰНҒАТАР

МЕНШІКТІ ТІЛШІЛЕР:

Жамбыл ауданы – Серік САТЫБАЛДИЕВ	8 701 254 97 55
Қарасай ауданы – Қуат ҚАЙРАНБАЕВ	8 701 347 60 32
Талғар ауданы – Құтмағамбет ҚОНЫСБАЙ	8 702 488 56 12
Еңбекшіқазақ ауданы – Құралай МҰРАТҚЫЗЫ	8 700 573 30 11
Іле ауданы, Алатау қаласы – Бағдат ШОЙБАС	8 705 261 50 98
Ұйғыр ауданы – Анар ДҮЙСЕНБАЙҚЫЗЫ	8 702 213 95 83
Райымбек ауданы – Жұмабек ТҮРДИЕВ	8 777 029 45 22
Кеген ауданы – Дәурен ӘБУТӘЛІПОВ	8 777 218 63 25

ЖАРНАМА БӨЛІМІ:

Жауһар АМАНГЕЛДИЕВА 8 708 210 95 71

alatau_jarnama@mail.ru 8 747 688 17 41

Жарнама, хабарландырудың мазмұны мен мәтініне тапсырыс беруші жауапты.

Газет облыстың бөлінуіне байланысты жандан тіркеліп, 2022 жылдың 3 қыркүйегінен Қонаев қаласынан шығады

Жарияланған мақала авторларының пікірлері редакция көзқарасын білдірмейді

«Алатау арайы» газетінде жарияланған материалдарды көшіріп басу үшін редакцияның жазбаша рұқсаты керек

Газеттегі кейбір суреттер ғаламтордағы ашық дереккөздерден алынады

Газет аптасына үш рет – сейсенбі, бейсенбі, сенбі күндері шығады

Суреттердің сапасы үшін редакция жауап береді.

Газет Қазақстан Республикасы Ақпарат және қоғамдық даму министрлігінің Ақпарат комитетінде 2024 жылы 2 ақпанда қайта тіркеліп, № KZ22VPY00086933 куәлігі берілген.
Таралу аумағы: Қазақстан Республикасы

Газет Талдықорған қаласы, Қабанбай батыр көшесі, 32-үйде, «Алматы – Болашақ» АҚ филиалы «Офсет» баспаханасында басылады.
М. 1 2 3 4 5 6 7 8 9 10 П. 1 2 3 4 5 6 7 8 9 10

МЕКЕНЖАЙЫМЫЗ:
Қонаев қаласы, Достық көшесі, 1.
Тапсырыс – 1128

«Өлке тынысы» ЖШС басылымдарының жалпы таралымы – 12 000, оның ішінде, «Алатау арайы» газетінің осы шығарылымының таралымы – 7 823. Индексі – 64792.

Кезекші редактор: Гүлзат БАЙҚОНЫСОВА